




— PIERSON —
HENRY — JOSEPH


q. 34 selling



H. Hauser, III, 2417.







SOMMAIRE
RESPONSE A
L'EXAMEN D'VN HE-
RETIQUE, SVR VN DISCOVERS
de la loy Salique, faussement pre-
tendu contre la maison de France,
& la branche de Bourbon.

*La langue de l'homme sage sert d'aorne-
ment à la sagesse: mais la bouche d'un
sot iette des bouillons de folie.*

Prouerb. 15,

M. D. LXXXVII.

THE NEWBERRY
LIBRARY

Case

F

39

.326

1587A

SOMMAIRE

RESPONSE A L'EXAMEN

D'VN HERETIQUE, SVR VN

Discours de la loy Salique, faussement pretendu contre la maison de France, & la branche de Bourbon.

L y a quelques an-
 nees, long temps
 auant que l'on par-
 last de ligue ou
 contreligue en ce
 Royaume, que ie
 recueilliz ce que
 i'auois trouué escript de la loy Salique,
 non en intention de le publier ou faire
 imprimer: car si ainsi eust esté, i'en euf-
 se desia passé mon enuie, mais ce que
 i'en feis estoit pour mes estudes seule-
 ment, & comme l'on dit *mibi & musis*,
 & estimois que ne sortant point en lu-
 miere, ie pouuois dire ce que dit le

Poëte, *Non scribit cuius carmina nemo legit.* Et quand bien ce que i'en auois escript fust venu à la cognoissance des hommes doctes, ie n'eusse iamais creu que l'on eust interpreté les choses en mauuaise part, d'autât que ie n'ay pas ouuert le pas à ceste questiō, qui a esté tant & tant agitee par ceux qui en ont escrit & qui en ont fait des traictez entiers, comme par Pirrhus, par Scissel, Postel & autres, lesquels on n'a point pris au criminel, traictans d'vne maniere vulgaire & commune. Mais il est aduenü qu'ayant familierement communiqué ce que i'auois fait, à vn mien bon seigneur & amy, lequel alors feit contenance de l'approuuer, oncques puis ie ne l'ay peu retirer de ses mains, & (comme il est vray-semblable) de là quelque huguenot l'ayant veu, en a tres bien sceu faire son profit, non pas à l'encontre de moy, mais cōtre l'hon-

neur de Messieurs de Guyse, disant qu'eux aspirans à la Couronne de France, ils ont suscité quelqu'un des leurs d'escrire contre la loy Salique, & là dessus a prins occasion de descharger sa cholere contre ceste maison, à qui ils en veulent de tout temps, pour s'estre opposez à leurs mauuais desseings. Mais Dieu m'est tesmoing, si iamais ces seigneurs là y ont pensé, & voudrois demander, *Illud Castianum cui bono*. Car si la loy Salique n'a point lieu en ce Royaume, au proffit de qui la pourroit-on impugner, si ce n'est au proffit de la Royne d'Angleterre, qui est descenduë de la fille du Roy Philippes le Bel, qui pretendoit la Couronne de France, contre le Roy Philippes de Valois, depuis laquelle pretention, les Rois d'Angleterre se sont tousiours nommez Rois de France, & ont porté leurs armes escartees

de France & d'Angleterre. Mais il y a peu d'apparence que Messieurs de Guyse vueillent plaider ceste cause pour la Royne d'Angleterre, qui a interest à l'abolition de la loy Salique, & apres elle celuy qui pourroit debatre ceste loy, est le Roy de Nauarre, qui est descendu de la fille du Roy Loys Hutin, Royne de Nauarre, laquelle fut debouttee de la Couronne par le Roy Philippes le Long. Mais vous ne direz iamais que Messieurs de Guyse ayent fait ceste dispute pour le Roy de Nauarre, dont l'un de ses predecesseurs, Charles surnommé le Mauuais, voulut refraichir la querelle, pendant la prison du Roy Iean. Doncques si ce n'est, ny pour la Royne d'Angleterre, ny pour le Roy de Nauarre, que ceste dispute ait esté faite, au profit de qui pourroit-ce estre? car c'est hors de saison de debattre de

la succession de nostre Roy, qui est encores en la fleur de son aage, & se porte bien, Dieu mercy, lequel est pour enterrer ses heritiers presomptifs, & rabattre la presumption de ceux qui luy font sa sepulture avant qu'il soit malade, la loy declare celuy indigne d'heriter à vn duquel il dispose de sa succession avant sa mort. Or aduenant la mort de nostre Roy, sans qu'il laisse enfans pour luy succeder, (ce que Dieu ne vueille) qui a plus d'interest de soustenir que la loy Salique ne doit auoir lieu que le Roy de Nauarre, pour en exclurre Monsieur le Cardinal de Bourbon, son oncle paternel, quand il dira que la Couronne appartient à la Royne de Nauarre sœur vnique de nostre Roy, non à Monsieur le Cardinal, qui est plus proche du Roy que luy. Car au cas que la loy Salique ne soit practiquee en ce

Royaume, la Roynie de Nauarre y vient par droit de consanguinité, ie ne voy doncques autre qui puisse pretendre la Couronne contre la loy Salique, & ne puis penser quel droit Messieurs de Guyse se puissent attribuer à la Couronne, quand bien la loy Salique seroit abrogee, si ce n'estoit pour les enfans de la feuë Roynie d'Espaigne, ou de la feuë Duchesse de Lorraine, sœurs de nostre Roy, encores en tout cas ils seroient bien loing, pour y donner attainte, n'estans ny chefs des armes de Lorraine, ny les plus proches apres les chefs de ceste maison. Mais si telle estoit l'intention d'eux de debatre ceste loy, eux qui se sont declarez de la ligue sainte sous Monsieur le Cardinal de Bourbon, n'auroient pas permis que l'on eust mis au cōmencement du manifeste publié, que mondit sieur le Cardinal estoit premier Prince du sâg
de

deFrâce, ce qui ne peut estre fās approu-
 uer la loy Salique. Il n'ya dōc point d'ap-
 parēce qu'à leur suscitatiō on eust traitté
 de ceste loy, d'autāt qu'il n'est àpresumer
 qu'ils veulent abolir, ce qu'estant aboly,
 ne leur apporteroit aucū droict à la Cou-
 ronne. Mais quiverroit ce que i'en ay es-
 crit cognoistroit àveüe d'œil la calomnie
 de ce huguenot, pour ce que mes escrits
 ne sont faits pour impugner ou debattre
 ceste loy, veu que tout ce qu'on peut dire
 pour la fortifier & authoriser, y est mis,
 vray est, qu'à la façon de ceux qui traittēt
 vne maniere de droict, i'allegue tout ce
 qui fait pour & contre, ne pouuant sans
 preuaricatiō obmettre les raisons de dou-
 ter, pour apres les souldre & bailler sal-
 uations contre les cōtredits, à l'imitation
 de Pirrhus qui en a traitté amplement, &
 a amené toutes les raisons de droict d'v-
 ne part & d'autre. Que si en examinant
 mes escrits, vous me voulez faire mō pro-
 cés, sur ce que i'ay allegué les raisons de

douter, par ce mesme moyen vous trou-
 uerez que S. Hilaire estoit Arrian, S. Au-
 gustin Pelagien, S. Hierosme Donatiste,
 pour ce que vous trouuerez en leurs es-
 crits les argumens dont ces heretiques
 vsoient, & m'esbahiz, veu qu'estes Iurif-
 cōsulte, que trouuez mauuais ceste façō
 dont tous noz Docteurs de droict vsent
 ordinaiemēt. Or venōs à l'examen que
 faiçtes de mon traicté, où vous commen-
 cez par vne fausseté, pour ce que moy
 ayant dit que les François tenoient ceste
 loy en telle reuerence, que Paul Emile la
 nōme le Palladiū de France. Vous main-
 tenez impudemment que i'ay dit que ie
 m'esbahissois, comme Paul Emile auoit
 appellé le Palladium de la France, si cela
 y est, ie vous donne cause gaignee, ou s'il
 n'y est point, vous demeurerez calomnia-
 teur, que les Grecs nommēt diable, c'est
 donc mal enfourner à vous de chopper
 au seuil de la porte de vostre examē par
 vne fausseté. Suiuons voz disputes, vous

me reprenez que i'ay dict que la loy Salique est de droit positif, non de droit diuin, pour ce que si ainsi estoit la loy seroit obseruee en Angleterre, en Escosse, en Nauarre, en Espagne & par tout ailleurs, mesmes és Duchez de Frâce, comme és Duchez de Bourbõ, de Vêdosme, de Neuers, de Bretaigne, & autres, esquels les filles en deffault de masles succedent, & apportez les mesmes raisons que i'ay fait, que la femme n'est point faite pour commander: mais pour obeyr, ie n'approuuay iamais la ginecocratie, & à la miene volonté que la loy Salique ne fust pas seulemēt obseruee en ce Royaume: mais encores en Angleterre, les pauvres Catholiques Anglois n'experimenteroient combien l'impuissance des femmes est plus cruelle que celle des hōmes. Je m'estonne que ne craignez encores la malueillance de la Royne d'Angleterre vostre bonne amie, qui vous soustient le menton de si long tēps: mais c'est bien le

pis: car ceux de vostre religion n'ont pas
 seulement aboly la loy Salique pour le
 tēporel: ils l'ont aussi abolie pour le spi-
 rituel, la constituans chef de l'Eglise An-
 gloise, que si nous en faisiōs de mēme à
 Rome, ce seroit vne belle chose que de
 voir vne Papeſſe ſeoir en la chaire de S.
 Pierre, & vōdrois que non ſeulement au
 gouuernement du Royaume, la loy Sali-
 que fut pratiquee: mais aussi en noz mai-
 ſons particulieres, il n'y auroit point tant
 de gēs en peine cōme il y a. Voila cōme
 ie ſuis des vōtres en cela, & ne ſçay pour
 quoy vous fourniffez de ſaluations pour
 ceſte loy, que ie n'ay oncques cōtredictē,
 ſi ce n'eſt cōme a fait Paul Emile, qui a
 recitē ce que l'Anglois propoſa pour le
 droit de ſa Royne d'Angleterre, contre
 le Roy Philippes de Vallois, diſant: *Quid*
tandem ſcleris amiſiſſet Edouardi mater
vt à rege orta regūmque ſoror ſpe regni pri-
uari ipſa debeat, Du Haillā en ſon hiſtoi-
 re a fait vn long plaidoyē pour le droit

des Anglois, toute fois vous ne les repre-
 nez point de ce qu'ils ont dit, cōme vous
 me reprenez que i'aye touché quelques
 argumens pour & contre ceste loy, vous
 arrestant sur l'inconstance & autres vices
 des femmes, contre lesquelles vous auez
 conceu quelque dent, & croy que cela
 viēt que quelqu'une vo^r a eschaudé, ainsi
 qu'il est facile de iuger, vous oyāt parler
 du nez cōme vous faictes, cependāt vous
 n'en espargnez aucune, les mettās toutes
 en vn mesme predicament, que si la loy
 esté receuē en ce Royaume, non ailleurs,
 c'est pour ce qu'en nostre Frāce il y a plus
 de legereté en noz femmes, & moins de
 prudence qu'en Angleterre, où vne fēme
 commande au spirituel, au moins ie m'e-
 stonne que vous ne mettez scrupule en la
 consciēce du Roy de Nauarre, quād vous
 foustenez que le droict diuin ne permet
 point que la fille d'un Roy puisse transfe-
 rer la Couronne à la personne de ses en-
 fās malles: cōme il est aduenū au Royau-

me de Nauarre par tant de fois, & maintenant au Royaume d'Escoffe & en celuy des Espagnes & de Portugal: comme si Dieu auoit donné loy speciale pour la Couronne de France. Si dōcques i'ay dit que ceste loy estoit du droit positif, non generale par tout le monde, ay-ie mespris cōtre la loy de Dieu, la Royne d'Angleterre s'intitule Royne d'Angleterre, par la grace de Dieu. Faiſtes doncques reformer ses tiltres, vous qui auez tant de credit en son endroit, & faiſtes ce seruice à nostre Roy, qu'elle ne se die plus Royne de France, en quoy elle viole apertement nostre loy Salique. Mais c'est vostre coustume de vous seruir des loix selon qu'elles vous sont vtils & profitables. Vous faiſtes la genealogie du Roy saint Loys, & mettez le Roy de Nauarre au mesme degré de parēté que son pere propre, ne considerāt point que les Iuriconsultes ont dit que *quelibet persona facit gradum*, & de tous les arbres de consan-

guinité, ie n'en veis iamais vn pareil au vostre, qu'en vne mesme cellule il y eust le pere & le fils: mais i'ay descouuert vostre intention, c'est que Monsieur le Cardinal de Bourbon est au dixiesme degré de S. Loys, cōme aussi Mōsieur le Duc de Montpensier, & d'autant que le Roy de Nauarre est à l'vnziesme degré, & que craignez qu'il soit debouté par son oncle plus proche en degré, ou par son cousin aussi plus proche d'un degré, vous vous voulez eschapper, en mettant le pere & le fils en vn mesme degré de parété, voila comme vous faictes vn nez de cire à noz loix. Et pour ce qu'en ligne collateralle, la representatiō n'a lieu que pour les enfans des freres suiuant l'authentique *post fratres fratrumque filios, de legitimis heredibus*, vous passez outre & dictes qu'en matiere de succession à la Couronne, ceste authētique n'a point de lieu: mais que il y a representation en ligne collateralle *in infinitum*, ce que vous dictes en fa-

ueur du Roy de Nauarre vostre bõ Prin-
 cé & à l'exclusion de Monsieur le Cardi-
 nal son oncle & de Monsieur de Mont-
 pèſier, plus proches d'un degré que n'est
 le Roy de Nauarre. Et combien que ce
 ſoit vne regle meſmes approuuee par les
 Canonistes, *in Canone ad ſedem* 35. 9. 5.
 que quand il eſt queſtion de ſucceſſion,
 on doit touſiours ſuiure l'arbre de con-
 ſanguinité des Iuriſcõſultes: mais en ma-
 tiere de mariage & d'alliances, on ſuit
 celui des Canonistes, toutefois vous me
 reprenez que faiſant la genealogie de
 Meſſieurs de Bourbõ, ie mets les degrez
 à la façon des Legiſtes, non des Canoni-
 ſtes, & vous meſmes par apres recognoiſ-
 ſez que c'eſt la verité: mais ce qu'en fai-
 ctes eſt, que vous voulez monſtrer que le
 Roy de Nauarre appartient de parenté
 à noſtre Roy à l'vnzième degré, non au
 vingt-deuxième, & combien qu'au con-
 tre des Canonistes il ſoit à l'vnzième de-
 gré, vous le mettez au dixième par vne
 repre-

representation, comme si quand le petit
 fils succede à son ayeul par representa-
 tion, pour cela il fust au premier degré,
 non au second. Vous faictes des loix à
 vostre poste, & les rongnez & allongif-
 sez comme estriuires, vous sçauiez que
 le Roy de Nauarre n'a rien tāt à contre-
 cueur que le Pape & les saincts Canons,
 & toutesfois vous voulez qu'il s'aide des
 Canōs pour cōbattre son oncle, les tirās
 de l'arsenat du Pape. Theodore de Beze
 nevous aduouëra iamais de cela, pource
 qu'au liure qu'il a fait des degrez de pa-
 renté, il se mocque à pleine bouche de la
 façon de cōter les degrez à la mode des
 Canonistes, disāt que Dieu a permis que
 le Pape se soit abusé en cela, comme en
 toute autre chose, voyez donc où vous
 vous logerez: car si vous vous adressez
 aux Canonistes, ils vous diront que puis
 qu'il n'est point questiō de mariage: mais
 de succession, leur arbre de cōsanguinité
 ne doit point estre suiuy, Beze vous en

dira autant, desquels ferez vous à la fin,
 puis que ferez censurez tant en Sorbon-
 ne qu'à Geneue : mais comme vn erreur
 attire l'autre, vous allez de pis en pis: car
 quand vous faictes la genealogie de S.
 Loys & y mettez tous les Princes du sãg,
 vous obmettez à y mettre Monsieur le
 Cardinal de Bourbõ, & faictes ceste faute
 par deux diuerses fois estre, pour ce que
 ne le cognoissiez pas: toutefois vous par-
 lez de luy en vostre preface, est-ce pour
 ce qu'il est Cardinal, toutesfois vous y
 mettez Mõsieur le Cardinal de Vendos-
 me son neveu, pourquoy donc est-ce vn
 bastard de la maison, ou s'il est indigne
 d'estre conté entre les enfans de S. Loys,
 qui aimoit tant les gens d'Eglise, & qui a
 fondé tant de monasteres en ce Royau-
 me: mais i'entends bien, vous ne voulez
 pas qu'il puisse succeder à nostre Roy,
 pour ce qu'il n'aime pas ceux de vostre
 religion, & trouuez meilleur que le Roy
 de Nauarre, qui est de la religiõ preten-

duë y succede, que celuy qui maintiët la foy Apostolicque & Romaine, dont toutesfois vous vous diëtes estre, ie m'en rapporte à ce qui en est : mais ie ne puis passer legeremēt ceste iniure que faiëtes à ce bō Prince qui n'a iamais forligné de la religion que tenoit S. Loys, qui est la vraye touche ou nostre Seigneur veut que l'on recougnosse les enfans legitimes, ayant dit en son Euangile. Si vous estes enfans d'Abrahā, faiëtes les œuures d'Abraham, & S. Paul ayant dit. Si vous estes enfans de Dieu, vous estes aussi ses heritiers, ce qui s'entend aussi bien en la religion, qu'és biens tēporels. Mais quelle autorité ou cōmission auez vous, que faisant la mōstre de ceste maison de Bourbon vous puissiez cacher ce bon Prince, & l'effacer du roolle des Princes du fāg, a-il porté les armes cōtre nostre Roy, ou s'il est fils d'un qui ait fait la guerre à nostre Roy, dōt la generation ne deust estre contee entre les Princes du sang? le bon

seigneur se sent si net & innocent en sa conscience, qu'il n'a point laissé de se tenir pres de son Roy, comme encores il est à present, ne fessant iamais retiré à la Rochelle ou ailleurs, comme en vn asile & lieu de seureté pour fuyr la presence de son Prince, à qui il n'a iamais māqué de foy & de loyauté: mais le mal que vo^r luy voulez, est qu'il s'est declaré & manifesté vouloir soustenir la foy Catholique, la foy dont nostre Roy tres-chrestien fait profession, plus que iamais aucun de ses predecesseurs, la foy pour laquelle maintenir le Roy est monté à cheual, a endossé le harnois pour y mettre tous ses moyēs, & sa vie propre, ce qu'il a promis en plusieurs assemblees generales qu'il a faites, & qu'aujourd'huy il execute. Voila où le mal vous tient, & d'autant que vous ne vous osez prendre au Roy vostre maître, qui a reuocqué l'Edict de pacification pour extirper l'heresie, vous vous en prenez à ceux qui ne fōt que ce que leur

Roy leur. commãde. Mais passons outre & venons à l'examẽ que vous faictes de mes escripts, vous disputez vne question que i'ay faicte, sçauoir si le Roy venoit à decedder sans enfans, (ce que Dieu ne vueille) & que le plus proche parent du Roy fust idiot & insensé, ou fust heretique, si en ce cas on pourroit le declarer indigne & incapable de succeder à la Couronne, & apres auoir agité ceste question, vous vous accordez avec moy, ou plustost avec la raison, que quand on parle d'un plus proche, on y adioustetoujours ce mot habile à succeder, & d'autant que la loy Salique est fondee sur l'incompetance des femmes, il est vraysemblable que si lors que la loy fust faite qu'une fille ne succederait point à la Couronne de France, on eust demandé si vn fils heretique y deuoit succeder, que l'on eust respondu que si la femme pour son infirmité en estoit incapable, à plus forte raison vn idiot & insensé, en seroit

indigne & encores vn heretique, lequel
 feroit cause de faire perdre la religion
 aux Catholiques, mais puis que trouuez
 bon que le Roy de Nauarre succede à la
 Couronne, faisant profession de la reli-
 gion reformee, que puis-ie pēser de vous
 sinon que desirez la mort de nostre Roy,
 qui est d'une religion diametralement
 contraire à l'autre, & puis (comme vous
 auez escript, le tenant de Clement Ma-
 rot) s'il faut que l'un des deux soit here-
 tique, lequel fera Catholique des deux,
 qui doiuē regner sur nous, vous vous gar-
 derez bien ce croy-ie d'en dire ce qu'en
 pensez. Tant y a que cela repugne fort à
 la religion dont vous faictes profession,
 que vous admettiez vn chef contraire en
 sa foy au corps Catholique, qui feroit
 faire ce que dit Horace, *Humano capi-
 ti, ceruicem pictor equinam*

Iungere si velit

Et m'estonne comme vous vous tour-
 mentez ainsi de la succession de nostre

Roy, qui est aussi ieune & dispose que le Roy de Nauarre, pour qui vous plaidez avec tant de passion. De ma part j'atteste Dieu qu'aucune autre affection ne me transporte que celle que j'ay à nostre religion, car hors cela

*Tros Rutulusque pari nobis discrimine
habentur,*

Je ne me dōne peine qui soit nostre Roy, pourueu qu'il herite aussi biē à la religiō de nostre Prince qui regne à present, qu'à sa Couronne, & qu'il ait autāt soing d'acquiescer la Couronne celeste, dont nostre Roy parle en sa deuise, disant:

Manet altera cælo,

Que de ceste Couronne transitoire & caduque, l'honneur de Dieu pour lequel nous sommes nez & mis en ce monde, nous doit beaucoup plus toucher au cueur, que l'interest d'un Prince pretendā à la Couronne, lequel, s'il ne reçoit les conditions iointes inseparablemēt au sceptre qui luy est mis entre les mains à

son sacre, ne me semble point legitime,
 & ne nous peut obliger tellement qu'il
 nous face renier nostre cefme, eftant dit
 en l'Euangile que celuy qui ne veut ouyr
 l'Eglife, nous doit eftre pour vn Ethni-
 que & Publicain, tant s'en faut que le de-
 uions tenir pour Roy, qu'il fe fouuienne
 que noz Rois ont accouftumé fe dire
 Rois de Frāce par la grace de dieu, & que
 pour auoir la grace de Dieu, il doit tenir
 la foy Catholique. Partant qu'il fe repre-
 fente ce que nostre Seigneur a dit: Tout
 premierement recherchez le Royaume
 du ciel, & tout le furplus vous fera ad-
 ioufté, qu'il recognoiffe que nostre Sei-
 gneur parlant du diable, a dit, le Prince
 du monde fera ietté dehors, & que ia-
 mais Prince ne fust fi puiffant qu'il peult
 fe dire Prince du monde, comme le dia-
 ble eft nommé, qu'il cherche donc vn
 plus beau tiltre que celuy-là, & ne vueil-
 le point fe dire Roy de France, qu'il n'ait
 mérité le tiltre de Roy tref-chreftien, he-
 reditaire

reditaire à noz Rois, qu'il despouille la
 peau de loup s'il veut entrer en la bergerie
 de Frâce, qu'il se reconcilie avec l'E-
 glise de Rome, de laquelle il est excom-
 munié, autrement qu'il ne trouue estran-
 ge que nous ne luy fassions foy & hom-
 maige, s'il ne l'a fait au Roy souuerain,
 duquel immédiatement il doit tenir son
 sceptre, & puis que les Rois sont vicaires
 de Dieu, & le representēt, comme pour-
 rons nous l'aduouier, s'il est desaduouié
 de Dieu. C'est là nostre mal, c'est nostre
 interest & non autre, le surplus ne nous
 retient. Mais ie n'estois deliberé d'entrer
 si auant en matiere, pour ce que par le
 traicté que i'ay fait de la loy Salique, ie
 ne fais aucune mention du Roy de Na-
 uarre, & ne parle qu'en la these, non in
 l'hypothese, & comme dient les Philoso-
 phes, *in abstracto non in concreto*, toutes-
 fois pour ce que l'examineur de mes
 escripts, m'y a tiré par force, i'en ay dit
 presentement plus que ie n'en auois fait

auparavant, & de fait si i'eusse mis chose
en mon liure qui eust esté exposée à ca-
lomie, ie ne me fusse point si familiere-
ment descouuert à celuy à qui ie l'ay
cōmuniqué, qui tiēt des principaux lieux
en la Iustice, & qui deuoit m'admonne-
ster de mon deuoir, ou comme bon ser-
uiteur du Roy me deferer, comme ayāt
lourdemēt failly : mais il ne m'en feist ia-
mais la cōtenance, & croy qu'autre qu'un
huguenot n'y peut mordre : mais c'est
leur façon, ainsi qu'au serpēt, de cōuertir
tout en venin, pour apres le vomir cōtre
les Catholiques. Or ie ne me donne pas
beaucoup de peine de ce qu'il a dit con-
tre moy : mais il me fait biē mal que i'ay
esté l'ocasiō & le subiet, que l'ou ait ain-
si declamé cōtre Messieurs de Guyse, qui
ne peuuent mais de mes escripts, & ne
sçauent pas que ie sois né. Ce sont Prin-
ces qui desdaignent fort les escripts que
l'on fait cōtr'eux, & encores plus desdai-
gnent de respondre par iniures, auquel

combat, ainsi que dit Demosthene, celuy qui a le dessus est le plus deshonoré.

Pour doncques aucunement satisfaire à mon deuoir, & reparer ce qui leur a esté fait d'iniure à mon occasion, ie veux bien monstrier que ce bel examinateur par sa Preface faicte expresse pour auilir & deshonorer la maison de Lorraine, ne parle qu'en calomnie, detorquant la verité de l'histoire. Il dit que la maison de Lorraine n'a fait aucun seruice à la Couróne de Fráce, que ce sont gens de peu d'estoffe, gens que l'on appelle enfans de la terre, comme champignons creus en vne nuit, & si on le veut croire, il en fera de la paille aux pieds de ses cheuaux: Mais nostre Roy qui a pris femme en ceste maison, comme pourra-il souffrir l'auilissement de ces Princes, sa sœur auoit espousé le Duc de Lorraine, dont il a des nepueux & niepces, le feu Roy François second son frere auoit espousé la petite fille de feu Monsieur de Guyse. Voila trois en-

fans du Roy Henry second mariez en ce-
 ste maison, laquelle viēt du pere de Go-
 defroy de Bouillon Roy de Hierusalem,
 il y a cinq cens ans & plus, qu'ils conti-
 nuent de pere en fils à tenir ce Duché en
 souueraineté, qui est l'un des quatre Du-
 chez de l'Empire, neantmoins tousiours
 amy de la France, & si vous eussiez bien
 espluché l'histoire, vous eussiez trouué
 que depuis Ferry deuxiesme de ce nom,
 Duc de Lorraine, qui viuoit l'an mil deux
 cens cinquāte-neuf, ils ont tousiours con-
 tinué au seruice des Rois de France: car
 ayāt espousé la fille de Thibault troisiē-
 me Roy de Nauarre, Comte de Brie &
 Champaigne, petit fils de S. Loys, il fust
 nourry en France, son fils Thibault Duc
 de Lorraine, fut au seruice du Roy de
 France, & pour sa querelle fait prisonnier
 par les Flamands, il espousa la fille du
 Comte de Flandres, le fils de cestuy-cy
 nommé Ferry troisiēme, qui espousa la
 fille de l'Empereur Albert d'Austriche,

fut nourry chez Charles de Vallois, tige des de Vallois, qui le feit deliurer de prison. Son fils Raoul mourut en la bataille de Crecy, sous le Roy de Frâce, il auoit espousé la fille de Guy de Chastillon, Comte de Blais, petite fille de Charles de Vallois, pere du Roy Philippes de Vallois. Le fils de ce Raoul, Iean de Lorraine, fut nourry en France & prisonnier de guerre en la bataille de Bretaigne. Son fils fust Charles premier Duc de Lorraine, qui bailla en mariage sa fille vnique à René Duc d'Anjou, Roy de Sicile, son frere Duc de Vaudemont eut vn fils, nommé Ferry, qui espousa la fille de ce Roy, René d'Anjou, dont il eut René de Lorraine, qui succeda au Duché de Bar, & qui deffist en bataille le Duc de Bourgogne, que ce bel examinateur dit auoir esté chassé de France, pour ce qu'il querloit le Duché d'Anjou & le Comté de Prouence, qui appartenoit à son grand pere. Mais le contraire est bien tesmoi-

gné par Paul Emile, lequel dit qu'estant depossédé de son Duché par le Duc de Bourgongne, il estoit refugié en France, & dit ces mots, *Extorris in Francia*, tant s'en faut qu'il fust *Extorris* à *Francia*, c'est comme l'histoire est falsifiée, & Philippes de Commines escriuant de l'intelligence qu'il auoit avec le Roy Loys vnzième, dit que de son temps, les postes furent instituees en ce Royaume, affin d'auoir souuent nouuelles de luy, les enfans de ce René qui auoit espousé la petite fille de Pierre Duc de Bourbon, furent le Duc Anthoine qui se trouua en la bataille de Marignan, sous le Roy François, duquel Bayard estoit Lieutenant, & qui espousa la fille de Gilbert de Bourbó Duc de Montpensier, dont est venu le Duché de Mercur, le second fils fut Claude Duc de Guyse, d'Aumalle, de Mayne, d'Elbœuf, & Prince de Ioinuille, qui espousa Anthoinette de Bourbon, & qui fut aussi en ceste bataille de Marignan,

ainfi que tesmoigne Paul Ioue, & le seigneur de Laugai qui en parlent fort à son honneur, le troisieme fut Loys Comte de Vaudemont, qui uourut au voyage de Naples, l'an mil cinq cens vingts-sept, sous feu Monsieur de Lantrech, le quatrieme fut François, qui uourut en la bataille de Pauie, lors que le Roy François premier fust pris. Les enfans de ce Claude, furent François Duc de Guyse, qui fut blessé à Boulongne, ayant la teste percee d'un coup de lance Angloise, qui deffait l'auantgarde de l'Empereur à Renty, qui soustint le siege de Mets, reprit Calais, Thionuille & Guines de la main des Anglois, qui se trouua en la bataille de Dreux, és sieges de Paris, Rouë, & Orleans où il fust tué, son frere feu Monsieur d'Aumalle, perdit la vie dans les trâchees de la Rochelle, au siege que meit le Roy regnant à present, lors Lieutenant general du Roy son frere, feu Monsieur le Cardinal de Lorraine son

frere a eu cest hōneur d'auoir sacré trois Rois de France, Henry second, François second, & Charles neufiesme, & Monsieur le Cardinal de Guyse, d'auoir sacré nostre Roy, Henry troisieme, & lequel ayant reparé l'Eglise des Cordeliers de ceste ville, en tesmoignage de la faueur qu'il porte à ceste maison, s'estant fait pourtraire, il y a fait mettre les pourtraits des Ducs de Lorraine, Ducs de Guyse, de Mercur, du Mayne, d'Aumalle, & d'Elboeuf, Pairs de Frâce, les ayant honnorez des Estats de grand Maistre, grād Chambellan, grand Veneur de France, Gouverneurs de Brie, Chāpaigne, Bourgogne, Bretagne & Bourbōnois. Ceux donc que nostre Roy a ainsi honnorez, ie ne puis que ie ne les honnore, & n'estoit que cest examinateur a voulu examiner & rechercher curieusement leur maison, ie n'en eusse tant dit: mais s'il a pris quelque volupté à mesdire d'eux, i'eutends luy en faire perdre son plaisir,

non

non à remesdire de luy, mais à bien dire de ceux qu'il a blasmez, ce qui luy sera plus d'amertume que si ie m'adressois à luy mesmes. Or pour respōdre aux mesdisances de cest enuieuxmelancholique, qui reproche à ceste maison qu'il y a eu vn Comte de Vaudemont, qui a porté les armes contre vn Duc d'Orleans. Je dirois volontiers ce que dit le Roy Loys douziesme, qu'il y a bien difference entre vn Roy de France, & vn Duc d'Orleans, & que si le Comte de Vaudemont a fait la guerre au Duc d'Orleans, aussi a fait le Duc de Bourgongne, & si le Duc d'Orleans a fait guerre au Roy de France, tellement que pour cela il n'en a esté moins bon François. Que si nous recherchons l'histoire, ie ne sçay qui se trouuera exempt qu'aucun de ses ancestres n'ait fait vn mauuais office à son Roy. Le Connestable de Luxembourg eut la teste trenchee pour auoir esté en guerre con-

tre le Roy Loys vnziesme. Le Duc d'Alençon fut condamné à mort pour auoir failly en son deuoir. Et de ces deux là est descendu le Roy de Nauarre, comme aussi du Roy Charles de Nauarre, surnommé le Mauuais, qui feit tant de mal à la France, pendant la prison du Roy Iean. Toutesfois il n'est pas raisonnable de le reprocher à sa posterité, quand elle est fidelle & loyalle à son Roy. Nous lisons que quasi tous les Seigneurs de France se liguèrent contre le Roy Loys vnziesme, comme le Duc de Bourbon, le Duc de Bretagne, le Duc de Bourgogne, le Comte de Dunois, le Duc de Nemours, de Lantrech & d'Armignac. De dire donc que leurs successeurs en deussent patir, ce n'est iustice, ils ont depuis amendé la faute de leurs peres. Durant le regne du Roy François premier, le Duc de Bourbon luy fust desloyal, comme du viuant de noz derniers

Rois, le feu Prince de Condé qui mourut en bataille contre son Prince naturel. Ce que ie dis, ce n'est pour le reprocher à leurs successeurs: mais pour iustifier le seul de la maison de Lorraine, que vous remarquez auoir esté mauvais François, pour auoir prins party contre le Duc d'Orleans, & si luy qui n'estoit des subiets du Roy, est par vous déclaré traistre à la France pour auoir prins les armes contre vn Duc d'Orleans, à qui il n'estoit vassal, que seront ceux qui sont naturels subiets du Roy, qui se sont souleuez & rebellez contre luy. Ne pouuant cest examinateur faire pis à ceste maison de Lorraine, il luy reproche que feu Claude Duc de Guyse, mena quelques forces du Roy contre des Lutheriens qu'il deffoit à Sauerne, disant que le Roy l'auoit trouué fort mauvais, ie croy qu'il n'en est rien, & que le Roy François premier, qui fai-

soit brusser vif les heretiques de son
 temps, n'eust sceu receuoir nouuelles
 plus agreables que d'entendre, que
 les Lutheriens eussent esté deffaits en
 grand nombre, comme ils furent. Puis
 apres recherchant curieusement la vie
 de ce Claude Duc de Guyse, il dit que
 ayant prins la ville de Luxembourg, il la
 meit entre les mains de quelques Capi-
 taines Allemands, qui la trahirent à
 l'Empereur : mais en ce disant, luy mes-
 me confesse que ce fust par impruden-
 ce, & que depuis il r'habilla la faute par
 la prinse de Montmèdi. Ce Duc de
 Guyse fust Gouverneur de Champagne
 & de Bourgongne, & fort fidelle serui-
 teur du Roy. Par apres nostre Censeur
 vient à examiner la vie de François Duc
 de Guyse son fils, & luy reproche que
 pendant son voyage en Italie, feu Mon-
 sieur le Connestable de Mont-moran-
 cy perdist la bataille, & fust prins de-

uant sainct Quentin, que le feu Admiral de Chastillon laissa emporter : mais qu'en pouuoit mais feu Monsieur de Guyse, qui estoit allé en Italie par le commandement du Roy son maistre, doit-il estre respondant de tout ce qui s'est fait en son absence ? toutes les fois que feu Monsieur le Connestable a esté prins, Monsieur de Guyse n'estoit pas en Italie. Apres cela nostre Controolleur vient au Duc de Guyse qui est à present, & luy reproche qu'au iour sainct Barthelemy, il sauua quelques vns de la religion, il veut dire feu Monsieur le Duc d'Vzez, qui depuis se feist bon Catholique & bon seruiteur du Roy, & voila ce qui le fait creuer de despit, au lieu de le loüer de la douceur dont il vfa en rachepant ce Seigneur de l'heresie où il auroit esté. Voila tout ce qu'il a espluché curieusement sur ceste maison, qui est le subiect de la cholere, de

l'enuie & de la rage des huguenots. Puis il dit comme le Pape a descouuert leurs mauuais desseings, ainsi qu'il feist entendre à Monsieur de Luxembourg, beau-frere de Monsieur d'Aumalle : mais si ainsi estoit, le Pape n'eust depuis accordé secours, & de gens & d'argent à la ligue, & n'eust commandé à ceux du Clergé de France, de vendre leur temporel pour sauuer leur spirituel. Que ce Censeur doncques ne se flatte point en sa cause, & reconnoisse, que tant le Pape, que le Roy n'abandonnent point la cause de la ligue, qui ne s'est dressée que pour contreliguer les huguenots, qui ont euoqué des Reistres, Lansquenets, Suisses, & autres soldats des Allemagnes, de Dannemarch, d'Angleterre & d'ailleurs, pour mettre ce pauvre Royaume en friche, & le deserter par feu & par sang, si la bonté de Dieu n'a pitié de nous, qui auons meritè tout ce

mal, pour auoir par trop dissimulé par
le passé, & n'auoir pas repurgé l'here-
sie, qui est la vermine & chancre qui
par la contagion consomme & cor-
rompt le corps de nostre Eglise, qui a
esté rachetee si precieusement &
cherement par le sang
de nostre Sei-
gneur.

..

F I N.

maison de la ville de Paris
le 15 Mars 1789
par le Conseil de la ville de Paris
le 15 Mars 1789
par le Conseil de la ville de Paris
le 15 Mars 1789

Le 15 Mars 1789
par le Conseil de la ville de Paris

Le 15 Mars 1789

Le 15 Mars 1789

Le 15 Mars 1789

Le 15 Mars 1789

Le 15 Mars 1789

Le 15 Mars 1789

Le 15 Mars 1789

Le 15 Mars 1789

Le 15 Mars 1789

Le 15 Mars 1789

Le 15 Mars 1789

Le 15 Mars 1789

Le 15 Mars 1789

Le 15 Mars 1789

Le 15 Mars 1789

Le 15 Mars 1789

Le 15 Mars 1789

Le 15 Mars 1789

Le 15 Mars 1789

Adm.

